

曾被惡意留言導致迷失

# 心痛明禎受委屈 Edan:盡力保護佢

MIRROR成員姜濤、盧瀚霆(Anson Lo)、呂爵安(Edan)與李駿傑(Jeremy)昨日到觀塘apm宣傳ViuTV節目《呂濤米Lo Seoul》。提到Edan日前於直播真情剖白，承認林明禎對他很重要，問到做直播前有否通知公司？他表示因為太久沒做直播：「做直播係我同『爵屎』(粉絲暱稱)溝通方法之一，我想做番自己、想搵番以前輕鬆嘅Edan，想搵番個咩都唔驚、亂講嘢、做自己認為啱嘅嘢Edan，所以係時候踏出呢步。」並感謝「爵屎」不離不棄。

他於直播稱「意識到會失去啲嘢」，問到是否指因緋聞而失去工作？Edan笑言：「係驚！你問有冇失去啲嘢，點都會有。我日日都失去啲嘢，頭髮、骨膠原，覺得唔需要太理會外界。」對於不時收到網民攻擊性的私訊，他坦言無數次想回覆：「我會提到明禎，係因為自從公開追佢後，一直都有好多聲音、好多惡意，我係俾呢啲聲音導致好迷失！佢一個女仔要承受呢啲嘢，我覺得好唔易，某程度上係因為我令佢咁，所以我都覺得好唔好意思，一直都諗有咩方法可以保護佢。以前我驚，但有時我避而不談又引起其他人誤會，既然講又會寫，唔講又寫，不如勇敢啲表達，盡我能力保護佢，想話畀大家知佢係好女仔，佢

對我真係好緊要。喺我唔開心呢段日子，佢幫我好多。」

## 姜濤唔覺搶熊貓風頭

問到林明禎可有向他表示受委屈？Edan：「我都收到咁多惡意私訊，佢亦一定收到唔少！我唔奢望直播後會改變啲乜，但表達自己嘅想法係最重要。」

至於姜濤日前到主題公園出席活動時，被拍得工作人員講解時，他在旁稱「好想瞓覺」，被網民指不尊重場合。他解釋：「因為當時講緊熊貓好鍾意瞓覺，我哋見佢(熊貓)都瞓緊，見到佢瞓我又想瞓。我以後唔講喇，對唔住！所以今日都冇打喊露。以後講相反『精神』，我宜家好精神。」對於被指搶去熊貓風頭，姜濤驚訝說：「呢個都有得講？對唔住囉！我都唔會搶到鏡，嗰日見啲人淨係影熊貓。」

呂爵安(Edan)日前深夜開直播與粉絲傾偈，真情剖白指緋聞女友林明禎對他很重要。昨日他出席活動時坦言想尋回昔日「有啲句講啲句」的自己，不會再在意外界的聲音，並心痛明禎遭網民惡意攻擊，會盡能力保護對方。

■Edan 希望做回敢言的自己。



■林明禎與Edan傳緋聞後，在港的工作量大減。資料圖片



■左起：盧瀚霆、李駿傑、姜濤與呂爵安落力宣傳節目。



■商場各樓層都逼滿「鏡粉」。

# 張敬軒扮白雪公主驚變蔡琴

張敬軒昨日以代言人身份到紅磡出席品牌發布會，提到他早前用AI扮白雪公主的影片備受好評，他笑言抱玩樂心態拍攝，就似提早過萬聖節。問到覺不覺自己似真人版電影《白雪公主》女主角Rachel Zegler？他說：「我扮完之後都嚇一嚇，真係餅印樣，但我覺得最得人驚嘅係，再望真啲就似蔡琴。」他笑言自己跟多位女明星撞樣，慶幸個個都是美女。

軒仔透露最近情緒比較波動，因去年和今年都有重要的人離開，最近休息時夢見故人，故有少許離愁別緒的感覺：「依家會好好處理自己情緒，同朋友傾訴或者畀時間自己消化，又可以同朋友去做義工，覺得將對故人嘅思念轉化成一種好嘅能量畀自己，把握活在當下嘅時間。」



■軒仔性格樂觀，懂得將不開心的情緒轉化為正能量。

# 周吉佩夫婦再度蜜月

周吉佩為慶祝fan club成立兩周年，日前與粉絲一行近40人飛往塞班島慶祝，並順道為即將推出的新書影相及拍新歌MV。幾天行程中，吉吉與粉絲一起釣魚、浮潛、觀星。他表示最難忘是舉行小型音樂分享會：「大家見到我通常笑笑口，但其實我都會有壓力，我會不斷提醒自己要做得更好，唔想辜負大家對我嘅期望。」吉吉表示自從子女出世後，沒太多機會二人世界去旅行，今次終有幾天時間與太太邊工作邊拍拖，更在沙灘拍了不少照片，猶如再度蜜月。



■吉吉與太太在海灘影靚相。